

Samningur
Slökkviliðs Akraness og Hvalfjarðarsveitar
og
Slökkviliðs höfuðborgarsvæðisins bs.
um
gagnkvæma aðstoð

Maí 2021

1.0. Almenn

Slökkvilið Akraness og Hvalfjarðarsveitar (hér eftir nefnt SAH) og Slökkvilið höfuðborgarsvæðisins bs. (hér eftir nefnt SHS) gera með sér svohljóðandi samning um gagnkvæma aðstoð. Samningurinn er byggður á 3. mgr. 20. gr. laga nr. 75/2000, um brunavarnir, en þar segir að slökkviliði sé heimilt að veita aðstoð við slökkvistarf eða viðbrögð við mengunaróhappi utan eigin umdæmis og slökkviliðsstjóri þess slökkviliðs sem veitir aðstoðina hverju sinni skal hafa að leiðarljósi að brunavörnum í hans umdæmi sé ekki stofnað í hættu að hans mati.

Megintilgangur samnings þessa er að uppfylla markmið laga nr. 75/2000 sem er að vernda líf og heilsu manna, eignir og umhverfi með því að tryggja fullnægjandi viðbúnað við eldsvoðum og mengunaróhöppum á landi.

2.0. Ábyrgð og stjórnun

Ábyrgð og stjórnun aðgerða er samkvæmt staðsetningu vettvangs.

Slökkviliðsstjóri þess umdæmis sem vettvangur tilheyrir fer því með alla stjórnun og samræmingu aðgerða og starfa allir sem eru á vettvangi undir hans stjórn, sbr. 16. gr. laga nr. 75/2000. Einnig eru öll samskipti við utanaðkomandi aðila, s.s. löggæslulið, opinbera eftirlitsaðila og fjölmiðla, vegna aðgerða á vettvangi á ábyrgð viðkomandi slökkviliðsstjóra.

Komi til aðgerða á vettvangi sem fela í sér kostnað ber viðkomandi slökkviliðsstjóri ábyrgð á greiðslu alls þess kostnaðar sem af aðgerðum á vettvangi kann að verða sem og innheimtu á kostnaði gagnvart tjónvaldi ef það á við.

3.0. Kostnaður vegna aðstoðar

Ef það slökkvilið sem veitir aðstoð telur sig hafa orðið fyrir kostnaði skal slökkviliðsstjóri tilkynna það til þess slökkviliðsstjóra sem fékk aðstoð. Uppgjör á kostnaði vegna aðgerða samkvæmt samningi þessum skal vera í samræmi við 20. gr. laga nr. 75/2000, en þar segir að það sveitarfélag sem aðstoðar nýtur greiðir kostnað við hana. Verði ágreiningur um kostnað skal hann ákveðinn af dómkvöddum matsmönnum.

4.0. Boðun í aðgerðir

SAH og SHS treysta Neyðarlínunni fyrir að fyrsta boðun sé alltaf í takt við alvarleika tilkynningar og báðir aðilar boðaðir ef það er mat Neyðarlínunnar með hagsmuni þolenda að leiðarljósi. Einnig geta SAH og/eða SHS óskað eftir því að Neyðarlínan boði hitt slökkviliðið til aðstoðar ef þörf er á. Umfangsmikil boðun skal ávallt vera í takt við 3. mgr. 20. gr. laga nr. 75/2000 og rýra ekki styrk þess slökkviliðs sem veitir aðstoðina án samráðs og samþykkis slökkviliðsstjóra.

5.0. Samningstími

Samningur þessi tekur gildi 1. maí 2021 og er ótímabundinn. Samningsaðilar geta sagt samningnum upp með 6 mánaða fyrirvara, en uppsögn skal miða við mánaðamót. Uppsögn skal vera skrifleg, uppsögn send í tölvupósti telst fullnægjandi.

Af samningi þessum eru gerð tvö samhljóða frumrit, sitt handa hvorum aðila. Rísi ágreiningur vegna samnings þessa skal hann rekinn fyrir Héraðsdómi Reykjavíkur.

1. maí 2021.

F.h. Slökkviliðs höfuðborgarsvæðisins bs.
Jón Viðar Matthíasson, slökkviliðsstjóri.

F.h. Slökkvilið Akraness og Hvalfjarðarsveitar.
Jens Heiðar Ragnarsson, slökkviliðsstjóri.

Rafræn undirskrift á næstu síðu.